

摘藻堂四庫全書薈要

集部

欽定四庫全書薈要

集部

文獻集卷九上

詳校官助教臣謝登雋



欽定四庫全書薈要卷一萬六千四百十六


集部

文獻集卷九上

元 黃潛 撰

墓誌銘

慈溪黃君墓誌銘

慈溪黃君卒于嘉興之寓舍其孤玠將返柩以葬來諗於某曰葬宜有銘敢以為請往者屬子銘吾母而子久未及為幸牽聯書之某之曾祖戶部公與君之大父宗卿府君同仕宋季夙有雅故而玠又與某託文字交誼

不得辭君諱正孫字長孺姓黃氏世為明之慈溪縣人
曾大父諱一鶚以子貴贈奉議郎大父諱震擢寶祐丙
辰進士第歷知撫州提舉江西浙東常平茶鹽其在江
西又嘗提點刑獄終於宗正少卿積階朝奉大夫父諱
祖勉蔭補將仕郎母林氏君生有美質雅志恬靜年十
二而宋亡即絕意于仕進父歿事母盡孝與仲父季父
患難相從不異貲產逮今雍睦聲已橐嫁孤妹三人皇
慶癸丑出遊西州玠負笈以從嘉興縣東魏塘之上有

義士吳君聞君父子名遣幣馬迎致之君欣然弗拒遂止居焉君履行端粹為學者所尊慕雅不喜記誦辭章之習文成無留藁晚自號尚絅翁以見其志云至正乙酉正月七日以疾卒享年八十有一屬纊之夕戒其二子曰吾祖一部州符三持使節泉麻葛越之衣菜茹魚鮭之食澹素終身日抄等書方今盛行遺風餘祚彌久弗墜汝等善繼承之無忝為清白吏子孫言畢而逝玠奉柩東還卜以某月某日葬定海縣靈緒鄉澤山之阜

從先塋也君夫人陳氏諱潤字汝玉同郡奉化人父著
宗卿府君同年進士由太學博士知台州公年二十出
爲贅婿居十有七年乃歸夫人于夫婦之間相成以道
執箕帚侍巾櫛無違禮治絲繭縫衣裳無廢事主饋食
共祭祀無曠典而又不憚劬勤致養于姑得其歡心詩
書語孟及女誡女則等篇皆能成誦玠方幼口授以書
程督嚴于外傳尤喜觀易所占多驗間作小詩亦有思
致嘗爲二子賦詩若干韻有關於倫紀可裨於治化學

士大夫咸稱誦之君居魏塘之明年玠即奉夫人來就養以泰定丁卯十二月十日卒年六十有三天曆戊辰九月某日歸葬奉化州剡源之三石子男二人長即玠次瑋女一今適戴幼儒故婺州路儒學教授帥初先生之子也孫男二人曾紹文女一人曾孫男一俊民惟宗卿府君以直道爲時名臣而其學一本於躬行所著書不爲空言以相高公親傳家學不自表暴而教其子玠克有成立遂以文名於一時世顧罕有能知君者銘不

可以無作也銘曰

汲黯之直侃侃宗卿義方之訓聞孫是承戰兢自持以
孝謹稱如萬石君不言躬行學以爲己善不近名逮爾
嗣人復用文鳴發潛闡幽式鴻其聲惟石可久薦以茲
銘

化州路儒學教授王君墓誌銘

化州路儒學教授王君諱勲字仲昭生十歲而孤能以
禮持其身以信義交於人貲產寔弗問而護視先塋惟

謹冠昏喪祭必考諸古之遺制而不苟同流俗文字之外無它嗜好宗族朋友稱焉仕未顯輒止而以壽終其賢乎人亦多矣君嘗教授肇慶遠郡事多率略學有田而無籍歲所入為租四百石而已君始至喻佃人令自實稱增其額為六百石廩食有餘而俗習鄙陋士氣弗張使者行部君請擇其知學而有文者試以經術辭藝得七人馬上其名于宣間悉補儒學官由是諸生莫不知勸暨取士之令下廣海數十郡不薦一人而肇慶首

以陳祖義充賦有司遂與中州之士並進於春官人皆
以為君作興之效也君初以江山教諭遷慈湖山長年
已垂四十又二十年乃拜肇慶之命及再調化州而君
已老故其才不究於用可見者若是而止人又皆惋惜
之蓋王氏上世有仕吳越為鎮城使者從其王歸宋有
宋日在睦州後徙家青溪又徙越之山陰始居青溪者
曰仁厚於君為九世祖曾王父諱遂良以恩贈訓武郎
王父諱灝擢慶元丙辰右科終於武經郎權發遣鬱林

州事父諱集當用蔭得官推與其弟而以布衣取鄉薦
母汪氏繼母趙氏薛氏而君周氏出也自訓武府君而
上皆葬山陰其居衢開化之馬金則自鬱林府君始山
陰之最著者曰佐以進士第一至某部尚書君改葬鬱
林府君于崇化鄉松公里之莊山尚書四世孫修職郎
易簡實誌之君卒於重紀至元之歲五月十四日年七
十有七以至正改紀之明年三月十二日葬于鬱林府
君墓左娶余氏先卒子男四人長曰墉次曰圻為伯氏

後次曰堪曰垌女一人適單父蓋士直孫男八人鉅鑑
銖鑄鑱鏐鉦鈺女二人適汪某黃梓君葬有日堪以書
抵某曰君之子辱婿先人孫女宜能道吾家世之詳敢
以銘為託某不得辭然竊觀自昔運去物改大家巨室
鮮不隨之惟君之先厚積薄發雖閱世已久而流澤未
艾君又廉於進取不盡享其有而以畀來人可託以永
存者固不繫銘之有無序而詩之聊以慰君於冥冥云
爾銘曰

有濬其源其求不窮用之也舒蓄也愈豐有沃其枝遺
澤是蒙歸乎何憾妥茲立宮

承直郎潮州路總管府知事孔君墓誌銘

君諱濤字世平姓孔氏先聖之四十三世曰後周曲阜
令襲封文宣公贈兵部尚書仁玉又二世曰宋給事中
贈太尉道輔又二世曰提舉江南西路常平茶鹽公事
贈中奉大夫傳南渡初自曲阜徙衢州又二世曰迪功
郎監潭州南嶽廟贈少傅行可則君之高祖也曾祖諱

從隆迪功郎祖諱應祥從政郎主管尚書刑工部架閣
文字入皇朝隱居弗仕考諱純西安縣儒學教諭以君
貴贈承事郎濟寧路同知兗州事妣陳氏贈宜人君幼
有異質五歲知讀書八歲能屬文架閣公愛其警敏俾
受業默齋留先生間出游郡庠別駕陳公剛中大奇之
年二十舉茂材異等一時名士大夫如永康胡先生吳
興趙公巴西鄧公無不器重焉婦翁徐聖子從事江東
憲府携君以行涿郡盧公柳城姚公前後持使者節君

皆爲之執弟子禮由是學益進聲譽益起用察舉署寧
國路儒學錄事朝廷著取士令延祐元年曲阜首以君
充賦東平曹公子貞得君所爲古文歎賞不已是歲以
鄉薦上春官所對傷太直且微譏切主司竟不合用特
恩補溧陽州儒學教授君既新其廟學而士多苦於賦
役爲白諸臺府悉蠲之七年再貢于東平未行江制行
中書省辟爲掾史曹務雖劇君隨事緩急闕白以行訖
無所壅杭之商稅比歲不登俾君趨辦旬月而集時宰

以爲能而風紀之司頗欲躡尋其過誤後乃察其無他
事遂釋至治三年復試東平第一以泰定元年賜同進
士出身用有官超授從仕郎平江路崑山州判官未上
丁內艱服除改吳江州判官用覃恩轉承事郎被省檄
點浙東諸倉庫餘姚因仍前弊糧不宿倉官吏惶駭莫
知所爲君知而不發使自爲之所糧既充而官吏亦得
自逭乃皆感服君始視州事囚有張甲以擅殺盜錢乙
坐逮獄已具君謂所殺非平民卒貸其死歲饑民多事

剽掠君設計捕致數十人謂此皆迫於凍餒而然不可
以強盜論杖而遣之州瀕太湖故柴埭以禦水繕脩無
時病民特甚君為改作使可支久民力以紓水嘗暴溢
君跣禱于市橋移時水降人恃以無恐而四郊之外有
溺死者君親收瘞焉鄰州飢憲府俾君往賑之全活甚
衆御史蓋公耘夫率同院舉君治績為諸州最未報會
霖潦害稼君所檢視當免輸田租者衆使者覆按左右
承風指誣君私庇之居無何誣君者以賄敗投遠方而

君得調桂陽州判官天大旱禱于神弗答君探獄有冤
出其無罪者三人乃雨廣寇竊發君獨任軍旅供億民
不擾而軍食亦無乏絕州民與蠻獠雜處素號難治知
州方思廣以貪虐啓其爭殺人寘弗問反加告者罪君
與之辨莫能直即日解印綬去韓公德新乘廉車按是
州劾罷思廣勉君復留君單騎直抵獠穴諭以禍福皆
讐伏聽命人賴以安秩滿遷潮州路總管府知事用入
廣陞承直郎先是君在桂陽感末疾而歸疾稍間潮州

迂吏至乘傳行次武林驛疾復作移寓龍山保和僧舍
一夕卒至正二年四月十七日也年五十有七妻徐氏
封宜人子男一人思構女三人適張日新陳煥盛麟君
易箒之夕惟思構及季女在側發書笥得遺訓數十百
言凡身後事區處甚具思構遵治命奉柩涉江還衢州
以其年七月四日葬西安鄉孝悌里先墓之次初太尉
世父既襲文宣之封五世至端友與中奉公同南徙由
端友至洙襲衍聖之封者又五世至元十九年秋七月

有詔令洙赴闕架閣公以族長被命與俱中道而返洙
獨入對廷議俾仍嗣襲洙力辭乃以爲國子祭酒提舉
浙東學校洙所居室扁曰存齋君惜其以存自號而不
能欽承德意存其封爵因自稱存存齋云君所爲詩尚
俊邁文渾厚不事纖巧有存存齋藁未及詮次惟闕里
譜系一卷爲成書君九歲時祖母黃氏有疾露香密禱
乞減壽一紀以延祖母之年疾遂愈後十年乃終人謂
君得年不永所禱殆有徵焉架閣公及兗州府君相繼

下世弟洧方孱弱君獨治葬祭貲產皆委而不較且援
近比請授以官存齋之子崇安尹楷卒于杭君輟錢營

護歸葬其子公溥暨兩女淪落民間咸訪求得之今公
溥已強而仕兩女亦各有家公溥兄割地為報却弗受
其孝友出于天性然也郡文學孔某系出永嘉族人以
其疏遠而弗之親適以事置對憲府時君甫八歲力為
求直而出之同里徐伯潤託其息女于君而沒君鞠之
如已子既長為嫁于士人術士顧知幾來謁遽以疾亡

君爲具衣衾以斂而緘其行橐惟謹妻子聞訃而至悉以授之皆感泣請以其術爲獻拒弗納有同與計偕者見黜于有司貧不能歸君爲貸錢一千緡於富人而代償之其人後亦取進士有祿秩或謂可責償矣君不聽而焚其券其急于人之患難窮厄多此類胡先生沒君集同志之士弔祭而上私謚焉默齋之喪主辦甚力漂水州判官朱性初與君聯事于省尹到官未幾而卒喪過杭君迎致於其家而爲位以哭親舊皆感動爭來歸

賻其篤於師友之誼又如此君與人交驩然無間然尚
氣不阿有過必面折之聞者若不能堪久乃服其識量
平生無苟取嘗預書大藏經有旨賜幣亦辭弗拜家居
不事生業有書五千卷而已君之葬也思構已記歲月
納諸壙復以狀來謁銘予締交於君最久且親自謂知
君莫予若而狀之所述多予未及知者予固不得而略
也庸備著以爲序而銘以系之銘曰

古有六行以教萬民比屋可封孰非全人矯矯孔君生

今之世無待而興六行兼備直道以行視險若夷出其
緒餘卒不大施爰擇斯歲里曰孝悌銘彰其存用諗來
裔

明威將軍管軍上千戶所達嚕噶齊遜都斯台公

墓誌銘

公諱托卜特穆爾字可與系出蒙古遜都斯台氏其先有事
太祖皇帝爲開國元勳者曰齊拉衮名在國史公高祖
也曾祖納圖爾御位下筆且齊繼領衛兵取遼破金屢

策奇功後攻西夏而歿於王事祖察喇從上親征西域
以功爲伊埒城子達魯噶齊又從太宗皇帝於潛邸經
畧中原立功尤多太宗即位錫金符改授隨州軍民達
魯噶齊父固納襲前職以隨州孤絕蒞治南陽府之昆
陽愛鄰境郟縣風土淳美因家焉至正十三年世祖皇
帝命相臣總兵伐宋公以管軍萬戶實預在行渡江後
加金虎符爲湖廣等處樞密院判官南土既平兵寢不
用累持憲節終於江西湖東道肅政廉訪使以長子實

里諤台貴贈江東建康道肅政廉訪使又以公貴贈通議大夫僉樞密院事上輕車都尉追封陳留郡侯謚景桓母博羅章封汝寧郡太夫人呼圖克章封陳留郡太夫人公以勲舊家子蚤備宿衛大德十年用臺臣薦佩金符爲武德將軍蘄縣萬戶府東平等處管軍上千戶所達魯噶齊延祐二年遷宣武將軍泰定三年轉明威將軍分城坐鎮自明而越前後共三十餘年以老致其事公性至孝陳留府君之爲湖南憲長有德於民其歿也相

與繪像而祠焉公不遠數千里求遺像以歸事之如生
存搢紳先生皆以詩文美之公於人有善稱歎不容口有
不善則爲之不懌終日至戟手怒罵之其善善惡惡亦
天性然也宋南渡初越人蔡定父年七十餘以事繫獄
法當贖而吏持不可定請以身代又不報乃自沈於府河
以死郡守爲出其父且具槨以葬嗣爲郡者立廟臥龍
山之麓請勅額號愍孝歲久廟廢而居民侵其地官不之
省公攝萬戶府事慨然曰孝子不祀人奚以勸會使者

行部亟以爲言使者顧謂守令曰承宣風厲郡縣責也
若等寧無愆乎即日使歸其侵地廟以復完國朝取宋
之兵至天台民婦王氏爲軍士所得自誓不辱至刻之
清風嶺齧指出血題詩石上投崖而死公移文有司爲
立廟迄今不廢刻有隱士吳君與公友善嘗謂吾死得
附葬於二戴無憾矣逮其既卒貧不能喪公輟俸貲倡
鄉人葬于書院之側其好義又如此公爲人廉介質直
不喜紛華講閱之暇日與賢士大夫游清言雅論亶亶

不倦縣車之後養高城南關齋閣懸弓劍著壁間聚古
今圖書布列左右延名師教其子每遇風日清美輒緩
轡郊外徜徉竟日或幅巾藜杖命家童抱琴自隨散步
間巷間稚耆迎笑扶擁而娛亦不拒也禮部侍郎台哈布
哈出守越作新學校行鄉飲酒禮迎致公居僕輔公升
降拜起不愆于儀人皆望而敬之公生於至元二年正
月三日卒於至正四年十二月二十八日享年八十有
四夫人哈倫氏封陳留郡君高氏朱氏俱范陽郡君子

男五人長大都以武德將軍襲職東平等處上千戶所
達魯噶齊次哈喇未仕次伊埒布哈元統元年進士累
遷承事郎南陽府穰縣達魯噶齊兼本縣諸軍鄂羅勸
農事次圖列圖至正五年進士授將仕郎衡州路衡陽
縣丞次旺扎勒布哈方治舉子業女四人長適宣武將軍
革縣翼上千戶齊巴克延徹爾次適都爾布台次蚤卒次
適國子學生呼圖克岱爾孫男七人諸孤遵治命奉柩歸
邳縣卜以至正六年某月某日葬先塋之次示不忘本

也以潛於公父子間有一日之雅奉鄉貢進士趙俶所
為狀來徵銘潛竊惟自昔帝王之興必有命世之材為
之股肱心膂披攘經營元啓鴻業功在社稷澤在生民
故天之報施也往往使後人保其祿位以承太平君子
無為之治其德厚者其流光豈不然哉而况公以陳留
府君為之父武德及穰縣衡陽為之子公居其間優游
自適享有上壽其存其歿皆可無憾顧潛之鄙陋衰朽
無以贊揚萬一庸忝取狀所述為之序而銘之銘曰

國家之興必有世臣由本而支彌久益振時方承平垂
衣當宁息馬投戈以文易武靖共爾位弗震弗驚禮義
干櫓舒舒扞城賓客在前圖書在右載懸吾車長歌擊
缶我弓我冶世適是承爾仲爾季人遺一經發藻儒林
踵武相接超而過庭珪重組疊生榮死哀雖歿不忘式
克有譽為前人光瞻言故丘返樞而祔念茲厥初祁連
之墓

穀城縣尉蔣君墓誌銘

故將仕佐郎襄陽路穀城縣尉蔣君諱吉相字迪卿其
先以國為氏代有聞人系序可見者唐吏部員外郎曰
則則之子曰勲仕吳越為其檢校司空兼御史大夫始
家于婺之東陽勲三子其仲曰承郢承郢之子曰駟由
駟八世至君之曾大父諱顯又卜居縣南之橫城大父
諱天庠宋紹熙中補迪功郎父諱沐特達多材智推先
志立義塾延時之鉅儒尚書侍讀方公逢辰以為之師
後進賴其淑艾率為佳士里人孫秘承德之時宰賈魏

公似道客也嫉其得士譽譖於賈復使人怵以禍福俾獻其所蓄珍玩之物弗為動則中以飛語坐徙廬陵賈以誤國獲罪去乃得自便逮世祖皇帝統一海內簡拔南士可官使者江東宣慰使左丞廉公以其名聞授進義副尉南康路建昌縣主簿年已踰六十謝病而歸終身不復出君幼警敏年十一罹寇難能計免宗黨咸竒之暨成人循循雅飭晦迹林泉間以逸溪自號示無仕進意會廉公之婿平章政事孔公宣尉浙東廉公念主

簿公不置屬之訪其子若孫孔公一見君深加器重居館下未幾而孔公拜湖廣行中書省左丞尋被召遂與俱北上時廉公已捐館舍孔公以見成宗皇帝有旨令備宿衛君驅馳兩京侍上起居服御以恭謹數被稱獎孔公欲命以官而廷議有不合弗果用君將南歸值仁宗皇帝入定內難正位東宮因留事焉時初置利用監擢君為其知事特下令畀承事階而執政疑非舊法乃已亡何以使事至閩中感瘴癘成疾還過蘭溪去家僅

二百里移疾而歸疾稍間將遂退休以就閒適上既登
極春坊寮屬並以恩起遷有單被者君為知事時所任
佐史也亦得儀封尉君已陞朝官品在第八乃止調君
穀城尉階不過初品人皆以銓曹失其平謂君盍自陳
君曰此上命也敢計其宗庠耶即日就道其縣長官故
給事於省闈未嘗獲與君齒一旦為寮而君顧位其下
恒不自安事無大小必咨於君兵燹後民多非土著往
往輕生而喜鬪其不能自業起而為盜者尤衆舊以王

簿兼警曹政既不專人益以慢至是設尉君首為之鎮
之以靜糾之以嚴俗為變而盜亦衰息民有訴仇家縱
火者君呼其鄰訊之曰火自內出乎抑自外入也乃逮
其仇屏箠楚以情詰之則惶恐具服其察理之明感物
之誠又如此部使者聞之欲辟置幕下君語人曰尉雖
卑官猶得以伸吾志奈何持文書俯仰偵伺為其所不
欲哉固辭弗就君讀書不屑屑於章句而能通其大義
處事之中節殆非偶然主簿公夫人曰劉氏而君戴氏

出也以咸淳十年十有一月辛巳生君於廬陵寓舍故主簿公以州名命君甫閱月而戴氏死旅殯廬陵餘四十年君每語及之輒泣然泣下穀城書滿代者不至謀於故人金同曰奉遷改葬是有著令吾將由漢入江汎湖以達廬陵子其護吾家沿江東下同曰舟行千里風濤不測我不能獨任斯責其俱歸而陸走衢信以往可也君如其言民聞其去皆遮道請留委曲勞遣久之乃羅拜而別君既抵家將治行而前所患瘴癘之疾復作

情愈迫切飲食寢處惕焉靡寧疾竟不可為以至治元
年正月丁酉卒於家享年四十有八臨終無它語惟戒
其子玄曰汝能返葬吾生母吾死瞑目矣君先娶施氏
宋國子博士郁之孫女逾年而出再娶朱氏故上虞縣
尹文魁之女子男一人玄也女四人長適道州路總管
府推官李裕次適同邑胡珣浦江趙友淳金華許元孫
男四人允同允興允享允昇女四人先是玄以泰定四
年正月丙辰葬君仁壽鄉戴初里水齧其墓乃至元

二年十有二月乙酉改葬于乘驄鄉御史里夏山之陽
虛其右以為朱夫人之壽藏作祠堂於墓前百步以生
母戴氏慈母曾氏祔食其別室仍卜地墓旁造窆穴俟
戴氏之柩既返而並瘞焉其改葬後七年亥始奉君嬬
李裕所為狀以銘來屬竊觀君服勤先朝遭逢之際亦
盛矣而不得在顯位及隨牒外補俛首下僚尋常資級
猶可序進而遽止於是小試之效雖班班可覩蓋未足
展其平生素蘊之萬一也歿又無以振之於幽可乎庸

弗讓而為之俾刻焉銘曰

士之用舍恒係其逢乘時捷出或取顯融嶷嶷蔣君鱗
攀翼附不自奮飛獨行其素雨露所濡蔚乎良材孰尸
繩墨奪為桷榱有隕自天豈不謂命嗇不使年莫俟其
定夏山鬱紆清淑所鍾兆茲新卜以寧君躬尚俾嗣人
飲其福澤龍光是承賁于松栢

將仕郎建德錄事劉君墓誌銘

君諱環翁姓劉氏其先自婺之金華徙台之寧海居縣

東北之閬風山曾大父嵩宋文林郎昭慶軍節度判官
大父應球宋迪功郎慶元府慈谿縣主簿父珪年十六
入太學遂家于杭仕皇朝為進義校尉寧海縣東奧等
處海船上百戶母陸氏君生三年而不能言既成童敏
悟絕人讀書至忘寢食母懼其以勞致疾禁弗與燈燭
君竊篝火閉窗隙坐必至四鼓年踰弱冠出從名師受
春秋學取元統元年鄉薦會科舉事廢執其業不少懈
若有待者逮今天子更新庶政科舉復行遂以至正四

年再薦于鄉登五年進士第授將仕郎建德錄事有在
君弟子列而與君為同年者曰文宣死於疫君經紀其
喪事無所避因染疾遷寓門人廉氏家而卒五月某日
也得年四十有三君初娶費氏前若干年卒後娶顧氏
合卺甫五日而君應薦北上費氏之媵方孕而未生也
君卒之日手自為書奉束帛為母壽第言旦夕南歸未
幾而廉氏家以其書與君柩俱至費氏媵之子邵祖生
已兩月君不及知矣母與仲兄饒翁哀慟幾絕時進義

府君歿已若干年猶旅殯于杭饒翁乃啓其殯并君之
柩返于寧海卜以某年某月某日葬某鄉某原且以狀
來謁銘予筮仕寧海聞閬風山中有兩先生曰劉公某
曰舒公岳祥並以文章大家師表一時心甚嚮往之而
兩先生之不可作已久暨辱交於君乃知君於劉公為
從曾孫舒公之子叔獻則君所從受業也木水本源有
自來哉君為人介潔不阿然不喜臧否人物與之游者
莫窺其涯涘其訓諸生於杭學具有師法識者多以遠

大期之際逢聖時賢才彙進而君獨遽止於是可哀也已始進義府君有子年十二而夭臨終言我死當復為劉氏子後十年見夢於父母曰我至矣果再得子八歲而又夭後二年復見夢於父母曰父母撫我厚豈忍捨去已而生君遂取昔人識環事名之曰環而字之環翁其再薦也適感異夢乃以字為名曰環翁云銘曰

不有時兮孰甄而拔之不有命兮孰夭而闕之得於彼而喪於此兮孰予而孰奪之母倚門而啼兮兒呱呱而泣靈

之歸兮何嗟及兒勉學兮天不忘往必復兮後其昌

贈奉議大夫大名路滑州知州驍騎尉追封白

馬縣子王府君墓誌銘

故贈奉議大夫大名路滑州知州驍騎尉追封白馬縣
子王府君以至元庚寅八月二十四日卒於宣城之寓
舍享年六十有八即宣城郭外西南岡下治地以葬而
府君元配劉氏前十有四年卒安厝開州已久繼室張
氏後二十有五年卒尚旅殯于揚州至元後丁丑府君

之子大有始並遷其柩合葬於府君之墓自為文刻石以誌焉初大有為江南湖北道肅政廉訪司知事援著令乞推恩其父母贈府君承務郎大名路同知滑州事大有張氏出也故張氏與府君同被命為恭人及大有遷平江路總管府推官而劉氏恭人之命亦下大有既陞五品乃加府君以今官階勲爵而劉氏張氏並追封白馬縣君大有使來諭于某曰誌所以昭世系謹歲月已納諸幽堂惟是先人劬躬樹德以承其先以啓其後

者宜有辭揭于墓之原以示子孫顧猶闕焉敢以爲請
按王氏之先實金之宗室完顏氏世居磁州有諱遠者
為金統軍使府君之父也自統軍而上遭亂失其譜莫
得而詳府君諱思孝字移忠幼警悟年方羈帛脫身兵
間東至大名居開之濮陽乃易姓王氏子孫至今因之
稍長喜讀書能屬文自處甚簡薄是時國家新取中原
海宇未一殊無仕進意泊天下既平朝野無事可以出
而仕而府君則既老矣惟資其子使為學庶幾它日能

自振拔而大用首以材見推擇尋入江東按察司為書
吏廉訪司立更留以為奏差府君委蛇就養久之乃以
壽終府君有子男四人長即大用次珪次大有也今為
奉議大夫廬州路六安州知州兼勸農事次大慶女一
人婿曰會稽縣主簿郭郁孫男九人女五人蓋金之將
亡大家貴族違親戚去墳墓散之四方而其後泯沒無
聞者多矣府君既有以自全而不墜其宗又能教其子
至於成立以備官使晚乃卒食其報豈偶然哉矧今大

有厯官所至有聲其在湖北平反辰沅常潤諸死獄人
尤以為明允臺府屢薦稱之其顯融未艾府君之宜見
褒崇者不止若今所書而已雖不克於其身措諸事業
平生之志尚何憾乎序而銘之俾後世知完顏氏之為
王氏王氏之在宣城皆始於府君也銘曰

完顏之支別為王氏遠迹于南由府君始惟時府君有
韞弗施一其初終靡間險夷保厥嗣人使有祿位貤恩
所加草木衣被其升在上神遊故墟降形在下兆茲坤

隅中爲同穴昭穆左右勒辭紀實式示爾後

贈文林郎江浙等處儒學副提舉許公墓誌銘
前進士許廣大爲武義之明年以內艱去銜哀致辭于
某曰昔吾父之棄諸孤也廣大年甫十有七後八年乃
以非才叨綴末第獲備官使又十有四年始用例贈吾
父文林郎江浙等處儒學副提舉封吾母太宜人廣大
祇奉命書將以告于墓下且求時之文人勒諸貞石以
昭先德而侈上恩詎謂吉凶同域吾母遽以疾不起風

木之悲罔極柰何忍未即死以終大事願推述吾父啓
慶儲祉源流之所自及吾母爲之欣助者合而銘之惟
許氏遠有世序其占籍台州路之天台縣莫詳所以徙
提學公諱嗣字繼可曾大父某大父某父某俱弗仕自
曾大父時以子孫衆盛俾人專一經故許氏明經者代
不乏人提學公少授尚書而於諸經無不通然未嘗資
以事進取爲名譽朝益暮習皆爲己之學其爲人純慤
靜重不妄言笑動以禮自持父喪哀毀骨立衰麻之制

哭踊之節必求合於古諸弟尚幼撫育訓誨至於成人而授之以室先世所遺貲產惟其所用無靳賓祭百須及門戶事悉心任之諸弟咸感化而父事焉其教子尤篤延師必一時名人躬承事之如弟子禮寢疾病之三月預爲詩示廣大詩僅百四十言而處已接物之道靡所不該廣大佩服不敢忘訖能有所樹立擢元統元年進士第調昌國州判官以選入行宣政院為掾史用資格序遷而來武義居亡何百廢具舉刑清訟簡民安其

業受知上官見謂廉能皆提學公之教而宜人相之也
宜人張氏同邑官族提學公之歿率諸子奉宅窆惟謹
事舅姑以孝治家勤儉而有法待宗黨恩意甚至遇貧
乏必周之諸子既蚤失所怙宜人遵遺訓戒勵之尤切
廣大在武義迎至宜人就養每晨出必告之曰臨事貴
詳審不可奪於私喜怒莫歸則詢于僕隸有少不厭其
意輒戚戚不樂前是武義數有水患謀作隄以捍之而
或者憚其勞勩先聖廟及學舍屢徙而多未完欲繕治

崇飾之而或者以為非所急廣大慨然以為已任宜人
曰德惠未施於人而並興土木之後得無為民病乎後
知廣大以身先之而人樂趨事乃喜其賢有識如此談
者多謂提學公雖老於山林而貤恩所及在其身後一
門之內死哀生榮可以無憾矣潛竊觀其示廣大詩有
曰金馬誇豪貴吾謂非世傑惟能師古道乃與禽獸別
然則穹官峻爵固非其所慕惟後之人能以斯道自任
以古人自期乃其所望也廣大既有以成其志曷可無

一言以慰之於泉下乎提學公卒於泰定二年七月某日享年四十有五以其年十二月某日祔葬於某鄉龍山八世祖墓次宜人卒於至正六年七月九日享年六十有九以某年某月某日合葬焉子男三人長即廣大文林郎婺州路武義縣尹兼勸農事次彌大喪明而卒次小戊方業儒女一人適趙景良先卒孫男一人孟浩女五人提學公有詩若干卷因其自號名之曰得靜齋集潛嘗序其篇端以為清高而不失乎迂平實而不近

乎俚茲故弗論獨序其平生大槩而銘之銘曰

許出太岳古之封君後以國氏世多顯人公居盛時乃
不有聞卒以不施藏器於身爰有淑德婉于名門克生
材彥孔敏而文惟君子使有社有民潤澤實豐水必有
源逝者如斯不亡者存龍光下賁耀於無垠公侯之復
在爾子孫龍山之原歸焉丘墳木則已拱合祔惟新歸
歟同穴表以貞珉

成全郎江浙官醫提舉張公墓誌銘

故成全郎江浙等處官醫提舉張公諱去非娶之東陽

人闕世祖亮宋政和中舉八行賜號冲素處士曰志行

者實兄弟行歿葬縣南乘驄鄉木掘嶺荷塘西原子孫
因家於荆浦父諱潤以脩德尚義為鄉善士母顧氏有
子五人公其季也少警敏有大志既壯而隱於醫其為
術深超徑詣精驗如神然不專於為人已疾尤善以太
素脈言人吉凶貴賤壽夭率皆奇中公自號實堂人罕
用為其稱而直以藝配其姓稱之曰張太素云至元二

十有六年大盜竊發於鄰郡蹂踐縣境尚書左丞史公
弼宣慰浙東督諸軍討捕之一夕氣填膺逆上結塞脹
滿寢食併廢公授以一劑立愈因留置幕下及移屯永
康縉雲皆預在行將卒道病與藥輒効事平計功行賞
當得官公謝非其本志不就乃署公本郡官醫提領史
公入朝或詢以江南名醫必首及公且貽書招致之大
德五年公至京師而史公由僉樞拜平章政事行省江
西後二年召還樞庭見公歡甚陞對亟薦公于上李叔

固丞相時領太醫奏用公為尚醫奉御食五品祿明年
扈從上京阿固圖楚王疾劇有旨命公往視之王既平
復入謝上嘉獎焉又明年王被命巡朔漠迴次和寧王
孫明安特穆爾有奇疾衆醫莫知所為遣府僚孫司馬
者詣闕請輟公以來公以體氣漸衰不任遠役懇辭上
再三勉諭出尚方襲衣重裘安車善馬資之以行仍勅
有司厚贍其家公既至施之鍼燭投之湯液閱月而疾
良已王為之剗羊刑馬大會宗戚餞公南還且遺以交

鈔五千緡白金百兩內謁者張哥司徒復言于上及東
朝加賜交鈔五千緡文綺四端以旌之由是聲動朝野
太醫剡上其名於中書以聞擢江西等處官醫提舉階
成全郎某年也公過家上冢即抵官下居三歲職事脩
舉省臺交譽之以秩滿去官僚屬皆泣拜而別公性溫
厚家食之日待鄉鄰有恩意以疾來告者赴其急無難
色方將於一丘一壑以怡神引年而江浙之命下矣到
官數月俄拂衣而歸遂以天厯元年三月二十有四日

卒於家享年八十有三重紀至元之某年十二月某日
葬荆浦之北原元配何氏繼室馬氏皆前卒至是合祔
焉子男二人長安道何氏出終於杭州路醫學教授次
至道馬氏出前昌國州醫學教授俱能襲父業以醫名
女一人適厲孫男六人女二人曾孫男五人女二人公
之葬已久而墓上之石未刻於是至道以狀來取文為
銘且曰先人在京師時至道與先兄留治家事凡先人
所遊從與治療之曲折言人禍福之徵應皆莫能知其

詳所可知者又如如是而止先兄因赴銓謁叅知政事張公某公言昔吾尚少求而父切脉即知吾後當居政路不自意忝竊至此而父可謂精于其術者也今豈可復得哉由公之言而推其所不及知闕軼固多矣獨先人自序太素脉訣出於蜀之青城山王樸仙翁而歛人張子元子發嘗校其書傳至楊上善而予得之始奏請以行于世其端緒之相承可槩見也昔劉歆序七畧醫經之言人血脈經絡陰陽表裏者黃帝扁鵲白氏內外經

及旁篇七家而已蓋太素之脈尤秘而未出故無得而述焉庸備著公所序於銘文之首庶史官傳方伎者有考云爾銘曰

太素之學古有別傳卓哉張公窮幽極玄爰取諸身以知來物活人之功抑其仁術帝謂斯人醫師之良畀以制書歸榮故鄉幡然勇退遂考終命前知孔灼順受其正公則遠矣公書具存發潛明微在爾子孫謁文訂實推述源委薦諸石章用裨信史

成全郎江浙官醫提舉葛公墓誌銘

公諱應雷字震公世為平江人其先仕宋季而未顯宣
義思恭於公為大父進義校尉從豫於公為父公少從
季父某受周禮為舉子業國朝取宋場屋事廢公無仕
進意若將終身焉初進義府君業儒而於九流百家靡
所不通尤工於醫公既不得以文學自見退而取家庭
所聞靈樞素問諸書之說研窮精覈見世之言醫者執
方拘論而莫究其源委多與古法背馳於是推五運六

氣之標本察陰陽升降之左右以定五臟六腑之虛實以合經絡氣血之流注而知疾病之候死生之期其處方劑施砭燭率與它醫異以此名動一時浙西提刑按察司判官李公某中州名醫也嘗自診視其父疾復以咨決於公聞公言父子相顧駭愕曰南方何以有此邪則盡出所藏劉守真張潔古之書與公討論所見無不脗合江南言劉張之學自公始公所著書大旨以為醫當視時盛衰劉守真張子和輩值金人強盛民悍氣剛

故多用宣洩之法及其衰也兵革之餘饑饉相仍民勞
志困故張潔古李明之輩多加補益之功至若宋之李
年醫者大抵務守護元氣而不識攻伐之機能養病而
不能治病失在不知通其變也書凡二十卷名之曰醫
學會同摘古語扁其齋曰恒蓋用術貴於通變立志則
不可無恒也江南士大夫聞公名奉幣馬迎致之無虛
日延譽益廣大德十年用薦者補平江路醫學教授治
廟宇闢土田教育其弟子員後多為良醫尋用省臺交

舉擢江浙等處官醫副提舉遂為其提舉階自醫愈即
陞成全郎延祐五年也公前後在官十年其學大行於
東南至治二年丁母憂而歸居喪過於哀毀如不欲生
竟以三年春正月十八日卒于家享年六十娶盧氏宋
某官鉞之孫女子男二人長震孫先五年卒次乾孫女
一人適胡就矩亦已卒孫男四人公資稟和粹識量明
達外嚴而內寬事親孝而友愛其弟鄉鄰有急拯救之
如恐不及人以長者稱焉乾孫既以泰定元年春二月

二十八日奉柩葬于吳縣至德鄉塋墅墩先墓之次後
十有三年始以前宋進士顏先生堯煥所為公行狀屬
予為之銘予觀前史傳扁鵲倉公華陀皆歷言其已試
之效先生狀公行皆畧弗著惟論次其所以為術之本
可謂善序事者也是用悉取而備陳之公雖寓迹方技
而未嘗廢詩禮之傳遭時承平復以經術網羅天下士
獨周禮為無所問乃俾乾孫學為詩以應有司之求乾
孫篤於學而敏於文庶幾能成公之初志者銘曰

猗葛公抱一經訖不試以術鳴帝有命公是膺樂其職
不近名尚有子蜚儒英際聖時伏必興馳茂恩耀泉扃
發其兆在茲銘

錢翼之墓誌銘

翼之姓錢氏諱良右世為平江人曾大父世昌大父格
父宗慶俱弗仕而大父用其仲子台州路總管府判官
宗顯恩贈承事郎鎮江路丹陽縣尹翼之生而不凡長
益闡敏徐文貞公持浙西部使者節台州君處其幕下

翼之因得侍公左右公見其言談舉止謹節有禮大奇之台州君同幕多名流公語之曰錢生濟濟有儒者意度令親簡編必成令器翼之亦感勵自力於學公所為詩文必出以示翼之其取重如此翼之既游文貞之門至於前代遺老若弁陽周先生淮陰龔先生當世宗工若剡源戴先生隆山牟先生永康胡先生翼之無不接其緒論中州雅望若薊丘李公漁陽鮮于公暨一時賢雋之士亦皆折行輩與翼之交故其聞見最為詳

博而吳興趙公巴西鄧公遇翼之尤厚數引拔之翼之殊無仕進意至大中行尚書省署翼之吳縣儒學教諭翼之欣然就職已代去輒不復出閒居三十年安貧守約未始有求於人一室蕭然坐客常滿詠歌酣嬉無虛日里中子弟來就學亦弗拒也御史聊城周公舉翼之宜在館閣未報而中書連被上旨擇工於書者俾書農桑輯要大學衍義有司悉趣翼之以應令竣事薦章交上亦不報浮光王公與翼之生同歲居同里公由戶部

尚書叅預河南江北行省事念故人之存者獨翼之將
力援之於朝而翼之素志丘壑至是亦既老矣翼之性
夷曠與人交無町畦篤於故舊往來尺牘裒輯衰治惟
謹時出以示人曰吾非以此衒其識人之多特以其間
有情辭諄切關於世教者不可廢耳然不喜於苟同人
有不善或面斥之以其行孚於人不以為異也大叅金
源天公嘗問翼之曰錢氏起五季有吳越子孫多在東
南且世有顯人君豈其裔耶翼之曰此無從稽也蓋某

之先有甕壚沽酒者每見故書紙輒手拾聚而焚之曰
吾子孫其有興於文學者乎公聞翼之言深服其質直
翼之晚自號江村民人因以江村先生稱之至正四年
五月八日以疾卒於家享年六十有七疾已革猶正巾
危坐秉筆作弟姪書頃之而逝初室徐氏廣德縣尉逢
吉之女無子繼室丘氏宋龍圖閣學士贈特進岳之曾
孫承奉郎稷之女子男一人曰達女二人長適張元善
前卒次適吳某孫男某女三人皆幼達既以其月十有

八日奉柩葬吳縣靈岩鄉黃山徐涇先墓之次而刻石誌其歲月且遵治命以狀來徵銘予辱遊於翼之父子間甚久別去十年而翼之遽不可作其以銘見屬望予厚矣達又好學有文能嗣其世業而汲汲焉用意於不朽事予何敢辭翼之有詩文雜著若干卷奎章閣侍書學士虞公已為之序以故弗論翼之於古篆隸直行小草無不精絕豪家貴人往往傳藏以為珍玩或有所挾而強使為之雖奉以百金弗顧也人多以是敬服之而罕有論其出處之

大致者序而銘之庶幾來世有以知其人也銘曰
由學而升不近乎名既仕而止不失乎己歲之若虛以
浮沉於里閑優游卒歲匪依隱而玩世惟以求夫志欲
知其人視此刻文

饒州路儒學教授許君墓誌銘

君諱熹字華甫婺之東陽人宋宣和中睦寇竊發八世
祖瓊聚民丁衛鄉井被州將命赴援有功得官尋以城
中兵食不繼力戰而死里人至今廟祭焉君父諱文昌

號空雲處士無子弟文奎實生君年十五育以為已子
處士兄弟素嚴厲君左右侍養各盡其道先意承志咸
得其懽心於同產弟兩人友愛尤篤先世之田廬一無
所較公上徵求百役之湏皆身任其費子姪化之靡有
間言異時處士兄弟從鄉先生石公游有雋聲後二十
年復遣君兄弟受業石公之門君幼警敏既長務以靜
專自持同門中推為高弟用舉者試憲府例當補縣教
官隨牒赴儒臺初筮得浦江會朝廷欲重師儒之選俾

職官一縣者悉改調於外省君解職以名剡上俄又命更其法從宣閩署置同時捧檄而去者一百四十人皆以次補授序遷間以舉子業自奮君獨恬于進取有司強充賦試不合輒棄場屋家食者久之始分教于武義再調處之麗水丁本生親憂服除或謂稍增加所厯月日則當陞君不可遂復調台之天台用累考充湖之東湖書院山長在武義取豪民所據山塘歸于學在天台預鄉薦者三人輟官俸斥私錢禮遣之募好事者捐田

以助養士東湖創於里之大家事多綿蕝亦勸之割田
附益焉秩滿調饒州路儒學教授拜命而卒臨終戒其
子曰爾等入當善事而母出當善事而叔父扶植吾門
戶使勿墜它則平日誨爾熟矣言訖而逝重紀至元之
元年十二月二十一日也享年六十有一六年十月四
日葬所居西北二里某鄉某原娶劉氏子男二人曰怡
曰愉女二人壻曰王濟川蔣世安孫男四人女四人君
貌癯而志倅儻自奉殊儉薄而客至館穀必豐贐必厚

產不踰中人而輕財急義族姻里黨老而無依幼而孤者衣食之未嫁者擇士族歸之歲饑鄰里不能自活者賑卹之故其善日積而家日耗歿後囊無餘蓄久乃克葬諸孤既誌歲月求予填諱納壙中仍踵門請予銘以揭于墓道予幸獲執弟子禮於石公與君為同門知君為深庸撫誌所述參以予所知序而銘之按東陽許氏出晉孝子攷孝子史有列傳其子孫至近世愈蕃衍居邑中者為西南兩族而君之先別居近郊之梅峴邑君

之族掇世科踐朝宁若以延賞入官者數十百年相望
不絕而君之先獨不大顯雖能捍大患以死勤事後之
人未有食其報者君生今聖時而以文學起家人謂其
將致身華要又邇迴而不進甫霑一命竟不及祿其不
可哀也夫銘以慰君亦以告于嗣人庶有知其委祉之
自而思亢其宗者銘曰

九軌之涂衆方疾驅長裾佩玉行之徐徐與物委蛇世
或謂迂銖稱寸量月計有餘成之匪亟得而莫居載其

榮光歸賁幽墟善積于家穰穰所儲有謹其承其發必
舒鸞翔鵠翥亢其門閭惟銘有徵永世不渝

鄒府君墓誌銘

無錫鄒君以至順二年十一月二十六日卒元統元年
九月某日葬後十有四年為至正七年其子師尹乃奉
故禮部尚書宛平曹公所為行狀來徵銘謹序而銘之
銘曰

鄒氏之先世居晉陵宋有忠公以剛直稱正色立朝不

震不懾元符三疏光于史牒子孫蔓延散處吳中還居
錫山家日以豐君之曾祖厥諱聞善祖諱成大再世不
顯遇事有勇及物以仁人憚其嚴而懷其恩父諱仁聲
始列仕籍將仕初階不有祿食恢其先業益厚于貲嗇
已裕人遂大厥施君諱德修字曰君永生而慧朗長而
凝靜志學嚮方器識愈宏時無科目不以文鳴遺榮自
通優游卒歲持身清約不事侈麗人有衣服美錦織絺
君則弗御終身布韋人有室廬穹檐邃宇君則弗居取

庇風雨推其所有惠于宗婣由近而遠卹其鄉鄰爾弱
我扶爾匱我給力苟可為靡有弗及或觸機弇深憫其
窮排難解紛不自為功青青者筠內虛外直以名吾軒
用厲厥德高蹈物表若與世違行孚于衆譽望所歸展
也吉人宜膺多祉六十八齡云胡不起君配華氏子男
一人是曰師尹有學有文其孫有七二男五女男侃與
儼克肖其父女適顧璋暨錢允臣餘皆幼艾在室未婚
泰伯之鄉崇德之里為君宅兆其葬以禮君所結交時

之豪雄知君最深莫如曹公謂君為人卓越醇厚其言
有徵可垂不朽瞻彼佳城松柏九九有子承考謁辭圖
堅顧慙不敏遙屬史氏畀以刻文昭示無止

蔣君墓碣

蔣君敬之名宗簡生三十有一年而死其友王厚孫以
狀述遺言來屬于余曰宗簡生不及從子遊死而得一
言爲不朽之託猶不死也嗚呼余之固陋何足以知敬
之敬之之望余則至矣敢不諾敬之上世居潤之金壇

宋南渡時七世祖兵部尚書少師莊簡公猷始遷四明其後多至顯官而敬之曾大父應黿大父與可父復祖皆弗仕母方氏敬之幼爽敏有雋聲程先生端禮歸自江東敬之以弟子禮見留居旁舍數歲凡天人性命之本古今治亂得失之迹靡不察究郡庠延敬之爲少學師諸生多貴游以其年少頗易之敬之于疑義數語而決以文來就正隨所治爲加潤色頃刻數十篇乃大悅服尋挈其徒寓湖心僧寺聚易詩春秋諸家之說而折

衷焉試有司不偶輒散棄其舊作或謂敬之不以盛壯
時挾所長取祿仕獨以古文自詭奚益敬之笑曰使吾
理明氣充其為文于決科何有得不得命也文有古今
之異邪既而稍出游江湖間遇臨川危素于金陵語意
合欲偕之至京師以母老不能去買未見書數百卷以
居翰林柳先生貫得敬之所為文擊節不已方為具薦
牘而敬之已屬疾遂不起至正元年十月十二日也貧
無以治喪天台陳廷言嘗主郡教為言於太守及寓公

率朋游之士合錢為助乃克以其年十一月某日葬鄆縣陽堂鄉桃輿先墓之次敬之娶趙氏有子男一人曰僖女二人所著有易集義詩荅問春秋三傳要義總若干卷文集十卷藏於家敬之為人介潔篤於自信重然諾恥為小廉曲謹人多稱其經學詞義而其卓然欲有所樹立以自附於古人者未必盡知之也昔之豐於材而嗇於年如王逢原邢惇夫輩盖有之矣此兩人得臨川豫章而其名益彰敬之有程先生以為依歸視昔人

可無憾尚奚以區區之言為予不讓而銘之者姑以慰其來意云爾銘曰

進而未見其止若有以為而今已矣昭明在上其歲在此

水西翁呂公墓誌銘

府君諱汲字仲脩姓呂氏呂氏於婺為著姓而非一族人因以其所居地望為別居永康縣之太平鄉者號太平呂氏宋之中葉有以經學教授于鄉里者曰遵遵之

子曰迪功郎師愈仇家構飛語中其長子約而連及之
父子同時與龍川陳公俱下天獄次子皓先以賑濟受
知倉使朱文公奏補郡文學用漕薦再上春官時年二
十有四叩匭上書乞納所得官贖父兄罪丞相白無例
孝宗正色曰義事安用例立命出之緣坐得釋者五十
餘人幼子源是為府君五世祖累贈通直郎高祖諱介
曾祖諱羔皆承節郎祖諱埜承信郎父諱懋咸淳間嘗
與計偕試禮部入皇朝版授知永康縣至元十五年也

母何氏知樞密院兼叅知政事夢然之從孫女府君少嗜學至老不懈讀書務窮理而於百家數術靡不旁通其說平居致養於親為具必豐族人不能自食者月有廩年當入學者家有塾列為成規守而不廢子女婚嫁必擇故家名族未嘗論財接賓友情文兼至各盡其歡而止鄰里有急必周之歲大祲為粥食餓者所全活以千百計至於自奉乃極簡薄衣無美飾食無珍味器用苟完出入無僕從唯以一僮挾策自隨人望之蕭然山

然山澤之癯也其恭儉出於天性孝友行於家仁愛及於宗族鄉黨可見者如此而又多材能遇事明敏所處必中於理衆咸厭服為人排難解紛勇於赴義不以為憚里中無賴之徒或假私鹽誣平民蔓延所及甚衆爲之力辨於官以免人尤德之初知縣公遭值江南新附官府未立毅然出任縣事而弗辭既撫定其民使無失業且爲之捍衛以備非常人恃以安及朝廷為置吏即奉身而退蓋志在用權以全其鄉井不藉是為進取之階也

其後大盜竊發官軍進討復強起之以為鄉道府君甫
踰弱冠實預在行身踐重山密林荒昧阻絕之境而直
探其巢穴事平口不言功識者推其雅量晚益務韜晦
自號冰西翁云前娶朱氏鄉貢進士環之女先四十三
年卒後娶趙氏叅知政事資政殿大學士順孫之女先
五年卒子男三人長曰梓本伯兄之子次曰權曰機
皆朱氏所出府君既早失內助二子又幼弱因鞠兄子
俾持門戶事而悉畀以知縣公所遺田宅權既長遣從

鄉先生許公益之受學入華山中業成未及見於用而先府君十五年卒無子府君以繼體之重為之斬衰三年仍命以機子烜為之後而機亦先府君三年卒女二人適同邑陳至寶東陽胡道隆孫男七人熙忠燧炯煜烜煥女四人曾孫男六人女九人府君生於宋咸淳四年戊辰閏月三日乙卯卒於今至正六年丙戌二月三日壬子享年七十有九諸孫以其年十一月三十日癸酉奉柩合葬于東陽縣西部鄉西郭先室朱氏之墓而

以狀來謁銘昔歐陽子有言為善無不報而遲速有時
予觀水心葉公銘迪功之墓曰治生能富教子能賢後
溪劉公銘通直之墓曰宗族稱其孝弟鄉黨敬其仁義
蓋呂氏之積累其來久矣至府君家益昌而其才又有
足用者苟出其緒餘稍自見於世宜不止為一鄉之善
士而已顧乃歛藏弗耀而優游以卒歲豈不曰為善之
報自有其時乎府君諸子雖早世而孫曾蕃衍生今昭
代必有能自致顯融而大亢其宗者為之銘以勗之且

以俟也銘曰

有伏必興斯理之常惟德之厚其流乃光吁嗟府君隱居
行義澤施於人而不有位保其世德望于一鄉繩繩子
孫積善之祥亦既有子胡又天閼百年之積鬱而不發
是繼是述在其孫曾尚克有聞天寵是承貤恩所加貢
及寔宥惟銘可徵勒此貞石

奉訓大夫婺源州知州致仕程公墓誌銘

公諱郇字晉輔姓程氏其先廣平人唐御史亮以直言

忤旨謫通義令通義宋眉州也子孫家焉高祖諱符孫
承事郎贈太中大夫曾祖諱公許嘉定四年進士官至
刑部尚書兼侍讀以龍圖閣學士致仕贈宣奉大夫謚
忠文始出蜀而僑居于今之湖州祖諱子泳贈奉直大
夫考諱繩翁朝散大夫將作監入皇朝以公貴贈奉訓
大夫台州路黃巖州知州飛騎尉追封烏程縣男妣陶
氏追封烏程縣君公幼聰慧又生於名家耳濡目染能
蚤有知年十二入鄉校傑出儕輩間稍長游心聖賢之

學於書無不讀為文博敏閱肆有奇氣下筆頃刻數千
言觀者莫不駭服前代遺老如尚書陳公存叅政文公
及翁大卿牟公巖與公居同郡咸器重之用薦者署嘉
興路儒學錄丁外艱服除陞平江之和靜書院山長書
院故在虎丘為寺僧所據既徙置城中豪家又欲奪而
有之賴公力爭而止秩滿上名中書適值銓曹行限年
法再調紹興之和靖書院山長書院舊有田七百畝籍
於郡學公取而有之用累考合格授將仕郎台州路儒

學教授新殿宇及禮樂之器增置養士之田百餘畝調
將仕郎鎮江路總管府知事郡當南北往來之衝前是
爲幕僚者窘於將迎事多留滯公獨處之裕如遷從仕
郎衢州路江山縣尹爲政務平易官府日益無事以餘
力造舟濟行者且買田百餘畝使爲久遠計使者行部
郡守縣令多坐事免公獨以廉介見禮遇再遷徵仕郎
武岡路綏寧縣尹縣鄰於嶺峒民夷雜處竊發不時公
拊循以愷悌之政人皆感化境內以安會廣寇猖獗犯

全道兩州長貳而下以供億軍需出境公獨任縣事師

旅經從枝梧遣發戒令嚴明士卒帖帖不敢肆行省檄
發屬郡民兵公選義勇應之皆慷慨赴敵戰數有功縣
有義倉糧二萬餘石積為豪強所侵公悉理徵之歲適
大祲賴以全活者甚衆有偽鈔獄十年不決公力辨其
非辜既而朝廷遣官慮囚閱其始末見稱明允陞承事
郎慶元路慈溪縣尹慈谿密邇師間事尤叢劇公設施
注措若不經意咸盡其宜縣故以食鹽額重為民病公

規畫有方賦足而民不因縣東花嶼蓀湖受諸水溉田可六十頃豪民或請堙湖為田而輸糧于官吏以成案請署公毅然不可事遂寢湖旁農家乃均獲其利公三為縣涖事之暇尤垂意于庠序之事年垂七十預請納祿遂以奉訓大夫徽州路婺源州知州致仕公既歸老于家杜門不出手植五柳于前庭扁曰柳軒舍下環以松菊時與諸老留連觴咏置家事不問四方來求文者應酬無倦色有柳軒退藁十卷歲于家俄感微疾既痊

而復作却藥謝醫談笑如平日忽命具湯沐斥女侍呼
子孫立左右端坐而逝公生于宋咸淳己巳四月一日
卒于今至正六年七月二十五日享年七十有八娶史
氏中書舍人某之孫女封烏程縣君子男四人長游兩
浙都運鹽使司海沙場鹽司管勾次濤次洽次潛女一
人適孟良實孫男八人權模楷植楫同生文孫住孫女
七人孫男一人游等遵治命以是年十月二十九日奉
柩葬於烏程縣永新鄉桃塢先塋之旁公爲人溫良易

直未嘗高自標榜與人交無畦畛與後生談前朝文獻
歷歷如指諸掌喜誘人為善不深於疾惡故賢者親而
愛之不賢者敬而畏之初龍圖公事宋理宗為兩制侍
從權臣枋國憮黨盈庭鋤姦衛良靡遺餘力凡五立朝
而五速煩言每一去國更得盛名公際遇聖世朝廷清
明而又恬處下列得以從容進退者與龍圖公所遭之
時異也某幸嘗辱登公之堂而接聞公之緒論游等又
不遠數千里奉國子助教宇文公諒之狀來徵銘誼不

敢辭銘曰

程顯唐世由御史君龍圖仕宋乃振於文危言正色匪躬之故寧與百壬更起迭仆高風盛德增光前人垂休委社逮其曾孫以名師儒為賢長吏視龍圖公世殊事異非有盤錯利器焉施長歌鼓缶式全其歸人之所瞻百年喬木世其家者是似是續

承務郎杭州路富陽縣尹致仕倪公墓誌銘

公諱淵字仲深姓倪氏其先汴人宋靖康時五世祖南

以武弁扈從南遷于錢唐四世祖某又徙家烏程故今
爲湖州人曾祖俊民弗仕祖椿年用同知樞密院事謝
公堂奏補官終於某路兵馬監押父守真輕財尚義鄉
稱善人入國朝以公貴贈承務郎松江府判官母濮氏
贈恭人公生而卓異精敏絕人讀書過目成誦德祐失
國科舉事廢公年甫九歲猶能習爲其文既長乃弃去
而刻意聖賢之學三山教先生繼翁深於三禮而尤善
易公從之游於節文度數之詳辭變象占之妙靡不博

考洞究叅知政事文公大理少卿牟公皆前代遺老莫
不器重焉用薦者署本郡儒學錄高公克恭持風裁慎
許可時為浙江行省左右司郎中聞公名欲識之一見
與語降歎不已曰君大才不可小用也及為南臺治中
侍御史首以教先生及鄧公文原陳公康祖姚公式與
公五人並薦于朝未報而行省調公杭州路儒學正河
南王布拉吉達嘗受業魏國許文正公之門方以平章
政事行省江浙聞公講說大契其意即遣子從公受學

且移文中書舉公可教國子而中書已定擬臺章所薦
五人各補郡文學乃以公為杭州路學教授視事伊始
承歉歲之餘倉庾枵然絃誦息響適嗣歲小稔則量入
為出節縮浮蠹既又復民間冒沒之田為米三百石貲
用稍究乃嚴飾從祀補造祭器自禮殿論堂書閣至官
屋室皆一新之先是列郡釋奠多用俗樂公訪得故太
常樂工兩人俾以雅樂教諸生曹監聞之因招致兩樂
工為國子樂師今諸郡備金石之樂實自公倡之秩滿

當改調於是高公已為吏部尚書舉公可任史事中書左丞高公昉前在行省雅知公即欲處以編摩之職公微聞之亟具啓事以親老乞便養遂以公為湖州路儒學教授未上丁外艱服除中書左司都事王公克敬知公不樂遠宦諭詮曹授以原缺復需次于湖州家食者十有五年恬然若與世相違泰定丙寅江南三省交聘公校文鄉闈使者同日至公辭不獲遂應江浙之命士論翕然歸之湖學自虞君志道主教事重構先聖殿而朽

鰾藻績多待公始完既又葺稽古閣改建講堂考安定
先生湖學舊法列經義治事諸齋以惠來學又創仁智
軒爲其游息之所其後學者爲公立生祠公移文止之
不得躬往撤之用累考入流授將仕郎太平路當塗縣
主簿時長官皆以故免去公獨理縣事延祐初經理田
土考覈多失其實賦歛不均公私咸以爲患公爲分畫
編次以爲圖籍出其隱匿而去其增加二稅乃如期而
集縣有定塘溉田可十頃豪家據而有之民以病告中

書下其事于版曹議以還民吏憚豪家莫敢奉行或吉

闕

命

闕

之和州民有田在縣境富家與為交易券

成而負其值民訟于官而富家執券自辨有司莫知所
裁乃越江來訴公探得其情始懼而以其直歸之縣民
立異姓為後者所後父母沒已久有非其族而姓偶同
者賂吏給憑改立而盡奪其貲產公焚其憑而釐正之
里父老數十人羅拜馬前曰公神明之政也歲適大侵
民以狀言災傷郡戒縣勿受公爭之不得即解印求去

郡中驚悟遣吏謝公且以檢視之事悉諉之公躬履阡陌不避其勤民賴以甦元公永貞為江東廉訪副使巡歷而還謂其使王公士熙曰吾分按太平池州廉能吏惟一當塗主簿而已王公亦素知公聞之喜力薦公才堪風憲元統乙亥江浙行省叅知政事富珠哩公朶復聘公司文衡禮遇尤至部使者舉公可上縣令而公以年垂七袞告老而歸授承務郎杭州路富陽縣尹致仕公天資粹美而輔之以學造次必由於禮家人未嘗見

其有情容居官朝出蒞事暮歸讀書課子弟或至夜分
不寐少嘗從星官厯翁治其術運筭尤精既老于家杜
門罕與人事接潛心於易著易集說二十卷圖說序例
各一卷十年之間精力盡在是書矣公寡嗜欲善攝養
老而氣貌益充無衰憊態俄以疽發背而卒病已革猶
置易說於几案間時諷誦之語其子曰死期至矣夫復
何言須臾脩然而化至正五年夏六月二十九日也娶
鄭氏先十八年卒贈恭人子男三人長驥已卒次駿松

江府儒學教授次駢女二人長適楊福孫亦已卒次適
陸元瑾孫男六人長璨用公廕為紹興路錢清務副使
次璫琰璋瑛瓚女三人曾孫男二人女二人公昆弟四
人伯叔季皆早世叔有遺孤甫四歲撫而教之踰於已
子伯季皆無嗣則以駢駢為之後駢等遵治命以其年
冬十月某日奉柩葬烏程縣德政鄉毗山先墓之次與
鄭恭人同兆域後四年乃命璫走京師屬某為之銘蓋
高公所薦五人惟鄧公掌制命侍經幄仕最顯公雖與

有民社而未足以展其材餘三人又僅止於文學掾然皆能脫畧名迹而以道義相高有識之士莫不服高公之知人而嘉五人之不負所舉也五人相繼下世已久今天子以鄧公先朝舊臣用臣僚奏請特賜以神道之碑銘而某以門生忝被上旨與聞論撰茲又執筆而銘公一時之人物至是凋落盡矣何能無感愴於斯文也哉銘曰

知人之明古以為難聲求氣應夫豈偶然公初有逢連茹

而進孰不望公爭翔競奮大道甚夷公行徐徐既揚其
英發而不舒白首一官老於文學本闡聖謨以開後覺
晚乃佐邑未究所施俄復引年納祿而歸加恩增秩不
煩以事鼓缶而歌優游卒歲儲祉則豐畀于來昆尚克
自振益伉其門史氏作銘言無溢美寫之方珉揚芬千
祀

文獻集卷九上

謹案卷九上十一頁後四行遜都斯台舊作遜都

臺今改後倣此 後六行托卜特穆爾舊作脫

帖穆耳今改後倣此 後七行齊拉袞舊作赤

老溫今改後倣此 後八行納圖爾舊作納圖

兒筆且齊舊作必闍赤今並改後倣此 十二

頁前一行察喇舊作察刺今改後倣此 前二

行伊埒舊作業里今改 前四行固納舊作忽

納今改後倣此 後一行實里諤台舊作式列

烏臺今改後倣此 後三行博囉章舊作博羅

真呼圖克章舊作忽都真今並改後倣此 十

四頁前八行哈倫舊作哈魯今改後倣此 後

二行哈喇舊作哈刺伊埒布哈舊作月魯不花


今並改後倣此 後四行圖列圖舊作篤列圖

今改後倣此 後五行旺扎勒布哈舊作完澤

不花今改後倣此 後六行齊巴克延徹爾舊

作齊伯顏察兒都爾伯台舊作朶爾伯觥今並

改後倣此 後七行呼圖克岱爾舊作忽都達
爾今改後倣此 二十九頁後二行阿固圖舊
作阿忽都今改 後四行明安特穆爾舊作明
安帖木兒今改 五十二頁後七行布拉吉達
舊作孛憐吉駟今改後倣此 五十五頁前五
行富珠哩舊作孛朮魯今改



總校官庶吉士臣張能照
校對官中書臣石鴻勳
謄錄監生臣張五誥